

Elínborg Margrét Jónsdóttir

frá Másstöðum

Fædd 30. júní 1921 – Dái 7. janúar 2007

Elínborg fæddist að Másstöðum í Vatnsdal. Foreldrar hennar voru Jón Kristmundur Jónsson, bóndi á Másstöðum, 1867-1947 og Halldóra Gestsdóttir úr Dýrafirði, 1890-1977. Petta var seinna hjónaband Jóns en frá fyrra hjónabandi sínu átti hann þrjár dætur, Þorbjörgu, Guðrúnu og Oddnýju. Fósturbróðir Elínborgar var Þorsteinn Guðmundsson, kært var með þeim og börnum hans en Elínborg átti engin alsystkini.

Að Másstöðum ólst Elínborg upp, níu ára gömul fór hún í farskóla og fannst henni gaman að læra. Elínborg fékk undanþágu til að taka fullnaðarpróf 12 ára gömul en þegar því var lokið gekk hún í tíma hjá prestinum í Steinnesi og lærdi íslensku og reikning. Þegar Elínborg var 15 ára var hún um mánaðartíma í Kvennaskólanum á Blönduósi. Á því sama ári fór hún líka í orgelnám hjá Jónínu á Lækjamóti sem reyndist henni örlagaríkt því þar kynntist hún dóttur Jónínu, Margréti, urðu þær góðar vinkonur og hélst sú vinátta alla tíð.

Þegar Margrét fór í Kennaraskólann langaði Elínborgu til að gera slíkt hið sama en þá var hún of ung til að geta farið. Hún ákvað síðan að sækja um að taka próf inn í annan bekk Kennaraskólans og fékk það svar að hún mætti taka próf með nemendum 1. bekkjar og ef það gengi nógu vel fengi hún inngöngu. Þegar hún kom suður frétti hún að það yrði aðeins einum bætt við og það í stað þeirra sem fengju lægra en sex. Hún las því eins og hún gat og tókst að fá lausa sætið.

Veturinn eftir að Elínborg lauk kennaranáminu starfaði hún sem heimiliskennari fjögurra barna á Geitaskarði en þar var þá mikil stórbú. Veturinn eftir ákvað Elínborg að prófa að kenna við skóla og fékk starf við Barnaskólann á Eyrarbakka. Þar var Elínborg aðeins einn vetur. Tók hún sér frí frá kennslu næsta vetur en hélt svo til Hvammstanga þar sem hún kenndi stúlkum sem nýlokið höfðu barnaskóla.

Ári seinna var auglýst laus kennarastaða á Skagaströnd og ákvað hún að sækja um. Elínborgu leist strax vel á Skagaströnd, þar var mikill uppgangur, þar átti að byggja fyrirmynnarbae og græða á síldinni.

Við Höfðaskóla hóf Elínborg störf haustið 1945, þá 24 ára gömul og við skólann starfaði hún út sína starfsævi og meira til. Árið 1985 hætti hún kennslu en var þá beðin að starfa við bókasafn skólans. Þar vann hún allt til ársins 1995 þegar hún létt af störfum, 74 ára að aldri og hafði þá starfað við skólann í 50 ár. Þeir voru því ófáir Skagstrendingarnir sem Elínborg kenndi á starfsferli sínum.



Elínborg var virk í starfi Sögufélags Húnvetninga og formaður um tíma og

átti stóran þátt í útkomu fjögurra binda rits um ættir Austur-Húnvetninga.
Elínborg giftist ekki og eignaðist ekki börn en bjó alla tíð með Halldóru,
móður sinni, þar til hún lést árið 1977.

Elínborg lést á Heilbrigðisstofnuninni á Blönduósi. Útför hennar var gerð
frá Hólaneskirkju laugardaginn 13. janúar 2007.

Sr. Fjölnir Ásbjörnsson.